

दिनांक 05.04.2025

समय: 18.45 बजे

आकाशवाणी जयपुर-अजमेर

प्रादेशिक समाचार

- मौसम विभाग प्रदेश रा केई ज़िलां मांय आवता तीन-चार दिन मांय तेज़ गर्मी अर लू सारू चेतायो।
- पंचायतीराज मंत्री मदन दिलावर बाड़मेर दौरा रे दौरान ग्राम पंचायतां मांय सफाई व्यवस्था माथे जोरदीनो।
- जयपुर डेयरी री भांत प्रदेशभर मांय 'सरस लाडो मायरा' योजना लागू करी जावेला।
- प्रदेश मांय दुर्गाष्टमी रीत मुजब सिरधाभाव सागे मणाई जा रही है—काल रामनवमी रे मौके न्यारा-न्यारा आयोजन व्हेला।

मौसम विभाग प्रदेश मांय आवता तीन-चार दिन मांय कठे-कठे तेज़ गर्मी व्हेवण अर लू बाजण सारू चेतायो है। महकमा रे मुजब इण रो असर आठ अप्रैल ताई रेहवण रा आसार है। ई दौरान राज्य रा आतूणी हलकां मांय पारो 44 डिग्री सेल्सियस ताई पूगण री संभावना है। ई बीचे, लारला 24 घंटां मांय बाड़मेर मांय पारो 42 दशमलव 7 डिग्री सेल्सियस ताई पूग ग्यो। जालौर, जोधपुर, चित्तौड़गढ़, कोटा अर टोंक मांय ई अधिकतम तापमान 40 डिग्री सेल्सियस ने पार कर ग्यो। राज्य री पाकिस्तान ऊं लाग्योड़ी सरहद कने एंटी साइक्लोन बणबा रे कारण गर्मी और तेज व्हे सके है। मौसम केन्द्र जयपुर रा निदेशक राधेश्याम शर्मा बतायो के प्रदेश रा तापमान मांय तीन ऊं चार डिग्री सेल्सियस ताई री बधोतरी री संभावना है।

.....

पंचायतीराज मंत्री मदन दिलावर कह्यो है के ग्राम पंचायतां री सफाई व्यवस्था मांय लापरवाही बर्दाश्त नी करी जावेला। श्री दिलावर आज बाड़मेर जिला रा उडंखा अर राणीगांव मांय सफाई व्यवस्था रो जायजो लेवण रे दौरान आ बात कही। वे ग्राम पंचायतां रा सफाई अभियान मांय सुधार लावण माथे जोर दीनो। पंचायतीराज मंत्री कह्यो के ग्राम पंचायतां मांय सफाई रा काम मांय लापरवाही करण वाळा अहलकारां, कर्मचारियां अर जनता रा नुमाइन्दां रे खिलाफ कार्यवाही करी जावेला। श्री दिलावर गांव वाळां सागे बातचीत कर र वां ने ग्राम पंचायतां मांय साफ-सफाई राखण बाबत् कह्यो।

.....

राष्ट्रीय विधिक सेवा प्राधिकरण री ओर ऊं आज राजसमंद जिला रा नाथद्वारा मांय राज्य स्तर री कार्यशाला राख्यी ज्यी। इण मांय केन्द्रीय मंत्री अर्जुनराम मेघवाल, सुप्रीम कोर्ट रा जज बी.आर. गवई, राजस्थान हाई

कोर्ट रा मुख्य न्यायाधीश एम.एम. श्रीवास्तव अर पद्मश्री ऊं नवाजी ज्या पर्यावरणविद् श्यामसुन्दर पालीवाल ई सिरकत कीनी। केन्द्रीय मंत्री पिपलांत्री मांय पर्यावरण रा हलका मांय करी ज्या काम ने सराहवणा जोगो बतायो। वे कह्यो के पैली वाळा सरपंच री पहल ऊं गांव मांय बेटी रा जन्म परां पौधा लगावण री रीत सरू करी ज्यी।

ई मौके खबरनवीसां सागे बातचीत करता थकां श्री मेघवाल कह्यो के कार्यशाला मांय पर्यावरण ने बचावण अर सामाजिक चेतना ऊं जुड़्या केई मुद्दां माथे विचार करी ज्यो।

.....

केन्द्रीय मंत्री भूपेन्द्र यादव आज कोटपूतली-बहरोड़ ज़िला रा नीमराना मांय एक गैर-सरकारी विश्वविद्यालय रा दीक्षांत समारोह मांय शिरकत कीनी। ई मौके श्री यादव भणार्ई-लिखार्ई रा महत्त्व माथे ज़ोर दीनो। वे नौजवानां ऊं देश बणावण मांय योगदान देवण बाबत् कह्यो। कार्यक्रम मांय श्री यादव 21 विद्यार्थियां ने सोना रा तमगा दे र नवाजा अर स्नातक अर स्नातकोत्तर री 344उपाधियां दीनी।

.....

गृहमंत्री अमित शाह रो काल कोटपूतली कने पावटा रा बाबा बालकनाथ आश्रम मांय व्हेवण वाळा धार्मिक आयोजन मांय शिरकत करण रो कार्यक्रम है। मुख्यमंत्री भजनलाल शर्मा रो ई ई आयोजन मांय सिरकत करण रो कार्यक्रम है। गृहमंत्री रा प्रस्तावित दौरा ने ध्यान राखता थकां ज़िला कलेक्टर कल्पना अग्रवाल अर एस.पी. राजन दुष्यंत आज आयोजन री ठौड़ अर न्यारी-न्यारी व्यवस्थावां रो जायजो लीनो।

.....

भारतीय जनता पार्टी रो 45 वो स्थापना दिवस काल मणायो जावेला। ई सिलसिला मांय 13 अप्रैल तांई न्यारा-न्यारा कार्यक्रम राख्या जावेला। क विभिन्न कार्यक्रम आयोजित किये जाएंगे। भाजपा रा प्रदेश अध्यक्ष मदन राठौड़ बतायो के ई मौके राज्य मांय ई न्यारा-न्यारा कार्यक्रम राख्या जावेला।

.....

प्रदेश मांय जयपुर डेयरी री भांत 'सरस लाडो मायरा' योजना लागू करी जावेला। ई रा तैत डेयरी ऊं जुड़्या दूध उत्पादकां री बेटियां रा ब्याह मांय डेयरी री ओर ऊं मायरो भर्यो जावेला। पशुपालन अर डेयरी मंत्री जोराराम कुमावत जयपुर डेयरी रा पचास साल पूरा व्हेवण रा सिलसिला मांय आज राख्यी ज्या कार्यक्रम मांय आ जाणकारी दीनी। वे कह्यो के आरसीडीएफ री मदद ऊं सरू करी जावण वाळी ई योजना ऊं करीब डोढ़ लाख दूध उत्पादकां ने फ़ायदो व्हेला।

.....

जळसा मांय राष्ट्रीय महिला आयोग री अध्यक्ष विजया राहटकर कह्यो के देश मांय डेयरी उद्योग रो करीब 70 फीसदी महिलावां चला रही है, जिण ऊं महिलावां माली तौर ऊं खुद रे पाण ऊबी व्हे रही है। राहटकर ई हलका ऊं जुड़ी महिलावां री डिजिटल साक्षरता अर तकनीकी सिखावण माथे जोर दीनो। सरस लाडो मायरा योजना री सराहवणा करता थकां राष्ट्रीय महिला आयोग री अध्यक्ष इण ने बेहतरीन पहल बताता थकां पूरा देश मांय लागू करण री राय दीनी।

.....

प्रधानमंत्री नरेन्द्र मोदी आकाशवाणी ऊं हर महीना प्रसारित कर्या जावण वाळा खास कार्यक्रम **मन की बात** मांय ई महीना 27 अप्रैल ने विचार बतावेला। आ ई कार्यक्रम री 121वीं कड़ी व्हेला। ई सारू आप ई 25 अप्रैल ताई सुझाव भेज सको हो। आप मुफ्त नम्बर **1800-11-7800** डायल कर र राय दे सको हो। **नरेंद्र मोदी एप या माय जीओवी ओपन फोरम** रे जरिए ई सुझाव दिया जा सके है।

.....

प्रदेश मांय आज दुर्गाष्टमी रीत मुजब सिरधा भाव सागे मणायी जा रही है। ई मौके देवी मिन्दरां मांय मां दुर्गा री खास पूजा-अर्चना करी ज्यी। घरां मांय ई कन्या पूजन करी ज्यो। काल राम नवमी मणायी जावेला। राम नवमी रे मौके न्यारी-न्यारी ठौड़ां शोभा यात्रावां निकाली जावेला अर धार्मिक आयोजन राख्या जावेला। राज्यपाल हरिभाऊ बागडे जनता ने राम नवमी री शुभकामनावां दीनी है। वां रा संदेश मांय राज्यपाल कह्यो के भगवान राम री जिन्दगी मुश्किल हालात मांय ई नैतिकता, सदाचार, त्याग अर सच्चाई रा गेला माथे चालण री सीख देवे है। वे सगळां री सुख-समृद्धि अर संपन्नता री कामना कीनी। मुख्यमंत्री भजन लाल शर्मा ई वां रा शुभकामना संदेश मांय कह्यो के भगवान श्री राम री जिन्दगी इन्सानियत सारू प्रेरणा देवण वाळी है।

.....

कोटा मांय नेशनल हाई-वे नं-52 माथे एक मोटरसाइकिल बे-काबू व्हे जावण ऊं इण माथे सवार तीन जणा री मौत व्हे ग्यी। मंडाना रा थानाधिकारी बतायो के हादसा रे कारण मोटरसाइकिल सवार लोग-लुगाई रो जोड़ो अर एक टाबर मौके ई दम तोड़ दीनो। बांसवाड़ा जिला मांय सल्लोपाट हलका रा खूंटा गलिया गांव मांय तळाव मांय डूब जावण ऊं तीन बच्चां री मौत व्हे ग्यी। अ बाळक वां रा पिरवार वाळां सागे एक ब्याह मांय शामिल व्हेवण सारू गया हा। एक ही पिरवार रा अ बाळक ढांढा-ढोरां ने पाणी पावण सारू तळाव कने गया हा। वटे एक बच्चा रे रपट र तळाव मांय पड़ जावण पाछे वां ने बचावण सारू दूजा दो बच्चा ई तळाव मांय कूद ग्या, ज्यां री ई डूब जावण रे कारण मौत व्हे ग्यी। चित्तौड़गढ़ जिला मांय निबाहेड़ा रा सदर थाणा हलका मांय बस अर कार री टक्कर रे कारण कार मांय सवार एक जणा री मौत व्हे ग्यी अर पांच जणा जख्मी व्हे ग्या।

.....

देवलोक व्ह्या मशहूर फिल्म अभिनेता अर निर्देशक मनोज कुमार री पार्थिव देह रो आज मुंबई रा पवन हंस श्मशान घाट माथे सरकारी मान सागे दाग कर दियो ज्यो। वे लम्बी बीमारी पाछे काल मुंबई रा एक गैर-सरकारी अस्पताल मांय आखिरी सांस लीनी ही।

.....

प्रदेश रो कपड़ा उद्योग माली व्यवस्था रो मजबूत स्तंभ है। राज्य ऊं दिसावर मांय बेचा जावण वाळा सामान मांय कपड़ा री मोटी तादाद है। राज्य सरकार **फाइबर से फैशन तक** री सोच सागे राजस्थान टेक्सटाइल एण्ड अपैरल पॉलिसी-2025 लागू कीनी है। आ नीति राज्य ने नुवा टेक्सटाइल अर अपैरल निर्माण केन्द्र रा तौर ऊं सामी लावण मांय खास पहल साबित व्हेला।

.....

प्रदेश रा न्यारा-न्यारा कॉलेजां मांय दो साल रा बीएड कोर्स मांय दाखिला सारू पीटीईटी-2025 परीक्षा 15 जून ने व्हेला। ई सारू सात अप्रैल ताई अर्जी दी जा सके है। उम्मीदवार पीटीईटी री वेबसाइट अर ई-मित्र रे जरिये अर्जी दे सके है।

.....